

四庫全書

子部

欽定四庫全書

子部

御纂醫宗金鑑卷八十六

詳校官太醫院恩糧臣孔毓秀

編修臣倉聖脉覆勘

總校官中書臣朱 鈐

校對官主事臣張 培

謄錄舉人臣郭履元

繪圖監生臣戴禹汲

欽定四庫全書

御纂醫宗金鑑卷八十六

編輯刺灸心法要訣目錄

灸難產穴圖

灸難產穴歌

鍼子戶穴圖

鍼子戶穴歌

灸遺精穴圖

灸遺精穴歌

灸癆蟲穴圖

灸癆蟲穴歌

灸痞根穴圖

灸痞根穴歌

灸肘尖穴圖

灸肘尖穴歌

灸鬼哭穴圖

灸鬼哭穴歌

灸中惡穴圖

灸中惡穴歌

灸疝氣穴圖

灸疝氣穴歌

灸翻胃穴圖

灸翻胃穴歌

灸腸風穴圖

灸腸風穴歌

灸暴絕穴圖

灸暴絕穴歌

灸鬼眼穴圖

灸鬼眼穴歌

灸贅疣穴圖

灸贅疣穴歌

灸癰瘰瘰瘰穴圖

灸瘰癧穴歌

灸腋氣圖

灸腋氣歌

灸瘋犬咬傷歌

無圖

灸蛇蠍蜈蚣蜘蛛咬傷歌

無圖

足三里穴圖

足三里穴歌

內庭穴圖

內庭穴歌

曲池穴圖

曲池穴歌

合谷穴圖

合谷穴歌

委中穴圖

委中穴歌

承山穴圖

承山穴歌

太衝穴圖

太衝穴歌

崑崙穴圖

崑崙穴歌

環跳穴圖

環跳穴歌

陽陵泉穴圖

陽陵泉穴歌

通里穴圖

通里穴歌

列缺穴圖

列缺穴歌

四季鍼灸坐向歌

灸法點穴用火歌

灸法蚤晚次序歌

灸法大小多少歌

灸法調養歌

灸瘡調治歌

灸瘡膏藥歌

行鍼避忌歌

四季人神所在禁忌鍼灸歌

逐日人神所在禁忌鍼灸歌

十二時人神所在禁忌鍼灸歌

禁鍼穴歌

禁灸穴歌

製鍼法歌

灸鍼藥方

御纂醫宗金鑑卷八十六目錄

欽定四庫全書

御纂醫宗金鑑卷八十六

編輯刺灸心法要訣

灸難產穴圖



至陰


灸難產穴歌

橫逆難產灸奇穴婦人右脚小指尖炷如小麥灸三壯
下火立產效通仙

註

婦人橫產子手先出諸符藥不效者灸此其穴在
右脚小指爪甲外側尖上即至陰穴也灸三壯艾
炷如小麥下火立產

鐵子戶穴圖



鍼子戶穴歌

子戶能刺衣不下更治子死在腹中穴在關元右二寸
下鍼一寸立時生

註

胞衣不出子死腹中宜刺子戶穴鍼入一寸其穴
在任脈經之關元穴傍右二寸

灸遺精穴圖




灸遺精穴歌

精宮十四椎之下各開三寸是其鄉左右二穴灸七壯
夜夢遺精效非常

註
遺精灸精宮穴其穴在脊之十四椎下左右傍開
各三寸灸七壯

灸癆蟲穴圖



灸癆蟲穴歌


鬼眼一穴灸癆蟲墨點病人腰眼中擇用癸亥亥時灸
勿令人知法最靈

註

勞瘵日久不愈互相傳染因內有勞蟲宜灸鬼眼
穴穴在腰間兩旁正身直立有微陷處用墨點記
合面而卧以小艾炷灸七壯或九壯十一壯多寡
量人蟲即吐瀉而出急取燒燬遠棄可免復傳擇
癸亥日夜半六神皆聚亥時灸之勿使病人預知

恐尸神有覺也

灸 痞 根 穴 圖




灸痞根穴歌

十二椎下痞根穴各開三寸零五分二穴左右灸七壯
難消痞塊可除根

註

痞塊灸痞根穴其穴在脊之十二椎下旁開三寸
半痞塊多在左則灸左在右則灸右如左右俱有
左右俱灸之

灸肘尖穴圖




灸肘尖穴歌

肘尖端處是奇穴男女癰癰堪灸也左患灸右右灸左
並灸風池效更捷

註

肘尖奇穴灸癰癰左患灸右右患灸左如初起時
男先灸左女先灸右兼灸風池穴尤效風池穴在
腦後顛顛穴後髮際陷中

灸鬼哭穴圖




灸鬼哭穴歌

中惡振噤鬼魅病急灸鬼哭神可定
兩手大指相並縛穴在四處之騎縫

註

鬼哭穴灸鬼魅狐惑恍惚振噤等證取穴將兩手
大指相並縛定用艾炷於兩甲角反甲後肉四處
騎縫着火灸之則患者哀告我自去為效

灸中惡穴圖




中惡穴歌

尸症客忤中惡病乳後三寸量準行男左女右艾火灸
邪祟驅除神自寧

註

灸尸症客忤中惡等證其穴在乳後三寸男左女
右灸之

灸 疝 氣 穴 圖




灸疝氣穴歌

疝氣偏墜灸為先量口兩角折三尖一尖向上對臍中
兩尖下垂是穴邊

註

灸疝痛偏墜奇穴法用稭心一條量患人口兩角
為則折為三段如△字樣以一角安臍中心兩角
安臍下兩傍尖畫處是穴左患灸右右患灸左左
右俱患左右俱灸艾炷如粟米大灸四壯

灸 翻 胃 穴 圖




灸翻胃穴歌

翻胃上下灸奇穴上在乳下一寸也下在內踝之下取
三指稍斜向前者

註

灸翻胃奇穴上穴在兩乳下一寸下穴在內踝下
用手三指稍斜向前排之即是穴也

灸腸風穴圖



灸腸風穴歌

腸風諸痔灸最良十四椎下奇穴鄉各開一寸宜多灸
年深久痔效非常

註

灸腸風諸痔奇穴其穴在脊之十四椎下傍各開
一寸年深者灸之最效

灸暴絕穴圖



鬼哭穴


灸暴絕穴歌

鬼魔暴絕最傷人急灸鬼眼可回春
穴在兩足大指內去甲韭葉鬼難存

註

凡一切鬼魔暴絕當灸奇穴在足兩大指內去爪
甲如韭葉許名鬼眼穴灸之則鬼邪自去而病可
愈也

灸 鬼 眼 穴 圖



灸鬼眼穴歌

腫滿上下灸奇穴上即鬼哭不用縛下取兩足第二指
指尖向後寸半符

註

灸腫滿奇穴上穴即兩手大指縫鬼哭穴也下穴
在兩足第二指指尖向後一寸五分即是也

灸贅疣穴圖



灸贅疣穴歌

贅疣諸痣灸奇穴更灸紫白二癰風手之左右中指節
屈節尖上宛宛中

註

灸癰風及贅疣諸痣奇穴其穴在左右手中指節
宛宛中俗名拳尖是也

灸癰瘰癧穴圖

癰瘰



灸癰瘰瘻穴歌

癰瘰隔蒜灸法宜先從後發核灸起灸至初發母核止
多着艾火效無匹

註
癰瘰隔蒜灸法用獨蒜片先從後發核上灸起至
初發母核而止多灸自效

炎腋氣圖



灸腋氣歌

腋氣除根剝腋毛再將定粉水調膏塗搽患處七日後
視有黑孔用艾燒

註

凡腋氣先用快刀剝去腋毛淨乃用好定粉水調
搽患處六七日後看腋下有一點黑者必有孔如
鍼大或如簪尖即氣竅也用艾炷如米大者灸之
三四壯愈永不再發

灸瘋犬咬傷歌

瘋犬咬傷先須吮吮盡惡血不生風次於咬處灸百壯
常食炙韭不須驚

註
瘋犬咬傷之處急急用大嘴砂酒壺一箇內盛乾
燒酒燙極熱去酒以酒壺嘴向咬處如拔火罐樣
吸盡惡血為度擊破自落上用艾炷灸之永不再
發炙韭炒韭菜也

灸蛇蠍蜈蚣蜘蛛咬傷歌

蛇蠍蜈蚣蜘蛛傷即時疼痛最難當急以傷處隔蒜灸

五六十壯效非常

註凡蛇蠍蜈蚣蜘蛛咬傷痛急勢危者急用艾火於傷處灸之拔散毒氣即安或用獨蒜片隔蒜灸之

二三壯換一片毒甚者灸五六十壯

足三里穴圖



足三里

足三里穴歌

三里膝眼下三寸兩筋間能除胸脇痛腹脹胃中寒腸
鳴并泄瀉眼腫膝脛痠傷寒羸瘦損氣蠱證諸般年過
三旬後鍼灸眼光全

註

三里足三里穴也其穴在膝眼下三寸胫骨外廉
大筋內宛宛中鍼五分留七呼灸三壯主治胸脇
疼痛腹脹胃寒腸中雷鳴脾寒泄瀉眼目紅腫膝
脛痠痛傷寒熱不已瘦弱虛損小腸氣痛與水氣

蟲毒鬼擊諸證悉宜鍼灸但小兒忌灸恐眼目不
明惟三十以外方可灸之令眼目光明也

內庭穴圖



內庭


內庭穴歌

內庭次指外本屬足陽明能治四肢厥喜靜惡聞聲癰
疹咽喉痛數欠及牙疼瘧疾不思食耳鳴鍼便清

註

內庭穴在足之大指次指外間陷中屬足陽明胃
經穴也主治四肢厥逆喜靜惡聞人聲癰疹不快
咽喉腫痛數欠牙齦疼瘧疾不思飲食耳內蟬鳴
等證鍼三分留十呼灸三壯

曲池穴圖



曲池穴歌

曲池拱手取屈肘骨邊求善治肘中痛偏風手不收挽
弓開不得辭瘕怯梳頭喉痺促欲死發熱更無休遍身
風癰癰鍼着即時瘳

註

曲池穴其穴在肘輔骨屈肘屈骨之中以手拱胸
取之主治肘中疼痛偏風半身不遂臂痛拉弓不
開兩臂癰瘕不能舉手向髮喉痺喘促欲死傷寒
振寒餘熱不盡皮膚乾燥痂疥等證刺七分留七

呼灸三壯

--	--	--	--	--	--	--	--

合谷穴圖



合谷穴歌

合谷在虎口兩指岐骨間頭疼并面腫瘧病熱還寒體
熱身汗出目暗視茫然齒齲鼻衄血口噤不能言鍼入
深三分能令人病安

註

合谷穴其穴在手大指次指岐骨間陷中主治偏
正頭疼面目浮腫瘧疾寒熱身體發熱汗不收目
翳視物不明齒齲朽痛鼻中流血不止口噤不開
等證鍼三分留六呼灸三壯

委中穴圖



委中

委中

委中穴歌

委中曲腠裏橫紋，
中央腰痛不能舉。
痠沉引脊梁，
風痼及轉筋，
痠痛難移向風痺。
痛無比熱病久在床，
足膝難伸屈，
伸屈鍼入即安康。

註

委中穴其在腠中央約紋動脈陷中，主治腰俠脊沉墜疼痛，癱瘓疾及兩腿肚轉筋疼痛難動風痺疼痛流注不定熱病難愈，兩足膝疼痛難伸屈等證，鍼五分留七呼禁灸。

承山穴圖



承山

承山

承山穴歌

承山名魚腹腓腸分肉間善治腰疼痛痔疾大便難脚
氣并膝腫兩足盡寒痠展轉成時疫戰慄瘡熱寒霍亂
及轉筋刺之立便安

註

承山穴其穴在腿肚下尖分肉間主治腰背疼痛
痔腫大便難脚氣膝腫脛痠跟痛傷寒時疫寒熱
瘡疾戰慄不能行立霍亂轉筋等證鍼五分灸五
壯

太衝穴圖



太衝

太衝穴歌

太衝足大指節後二寸中動脈知生死能醫驚癇風咽
喉并心腹兩足不能動七疝偏墜腫眼目似雲朦亦能
療腰痛鍼下有神功


註

太衝穴其穴在足大指本節後二寸陷中動脈隱
手病者有此脈生無此脈者死主治急慢驚風羊
癇風證及咽喉疼痛心腹脹滿寒濕脚氣痛行步
難小腹疝氣偏墜疼痛兩目昏暗腰背疼痛等證

鍼三分留十呼灸三壯

--	--	--	--	--	--	--	--

崑崙穴圖



崑崙

崑崙穴歌

崑崙足外踝跟骨上邊尋轉筋腰尻痛膊重更連陰頭
疼脊背急暴喘滿衝心舉步行不得動足即伸吟若欲
求安樂須將此穴鍼

註

崑崙穴在足外踝後五分跟骨上陷中主治腰尻
疼痛膊重不能舉及前陰腫痛偏正頭痛脊背拘
急暴咳喘促足脰腫不得履地等證鍼三分留七
呼灸三壯

環跳穴圖

環跳




環跳穴歌

環跳在髀樞側卧屈足取能鍼偏廢軀折腰返顧難冷風并濕痺身體似繩牽腿胯連膕痛屈轉重吁歎若人能鍼灸頃刻病消痊

註環跳穴其穴在髀樞中側卧伸下足屈上足取之
主治半身不遂閃挫腰痛不能回顧冷風濕痺周身拘急腿跨腿肚疼痛不能動轉等證鍼一寸留
十呼灸三壯

陽陵泉穴圖



陽陵泉

陽陵泉穴歌

陽陵居膝下外廉一寸中膝腫并麻木冷痺及偏風起
坐腰背重面腫滿胸中舉足不能起坐卧似衰翁鍼入
六分止神功妙不同

註

陽陵泉穴其穴在膝下一寸外廉陷中尖骨前筋
骨間主治兩膝腫痛及冷痺不仁半身不遂腰背
重痛起坐艱難面目浮腫胸中脹滿兩足疼痛難
移起坐不能支持等證鍼六分留十呼灸七壯

通里穴圖



通里穴歌

通里腕側後去腕一寸中欲言聲不出懊懷及怔忡實
則四肢重頭腮面頰紅聲平仍數欠喉痺氣難通虛則
不能食暴瘖面無容毫鍼微微刺方信有神功

註

通里穴其穴在腕側後一寸陷中主治聲瘖心煩
極甚怔忡不寧四肢重痛頭腮面頰紅腫倦言數
欠喉咽疼痛氣息不通虛損不思食暴瘖面無潤
澤鍼三分灸三壯

列 缺 穴 圖



列缺

列缺穴歌

列缺腕側上次指手交叉善療偏頭患
遍身風痺麻痰涎頻上壅口噤不開牙
若能明補瀉應手即能瘥

註

列缺穴其穴在腕後側上一寸五分
兩手交叉當食指末筋骨罅中
主治偏風頭痛遍身風痺麻木痰壅氣堵口噤不開等證
鍼二分留三呼灸三壯

四季鍼灸坐向歌

四季鍼灸坐向理宜從四季順自然
東南西北四維向

以迎生氣本乎天

註
鍼灸坐向避忌之理醫學入門春坐東向西夏坐
南向北秋坐西向東冬坐北向南皆背四季生氣
之向不可為法宜從春向東夏向南秋向西冬向
北四土旺月向四維以迎生氣本乎天理順其自
然為是也

灸法點穴用火歌

點穴坐卧立直正炷用蘄艾火珠良灸病古忌八木火

今時通行一炷香

註

凡灸法坐點穴則坐灸卧點穴則卧灸立點穴則立灸須四體平直毋令傾側若傾側穴即不正其炷所用之艾必用蘄艾艾令乾燥入臼搗去淨塵屑作炷堅實置穴上用葱涎粘固上古用火珠映日取火點之忌松柏枳橘榆棗桑竹八木之火今時惟用香火灼艾亦通行簡便之法也

灸法蚤晚次序歌

灸法溫煖宜於午上下陽陰先後分脈數新愈不宜灸
欲灸三里過三旬

註

凡灸百病原為溫煖經絡宜在午時陽盛之時火
氣易行必分上下先後上下經皆灸者先灸上後
灸下陰陽經皆灸者先灸陽後灸陰若脈數有熱
新愈氣虛俱不宜灸恐傷氣血但人有病欲灸足
三里者須年三十以上方許灸之恐年少火盛傷
目故凡灸頭必灸足三里者以足三里能下火氣

也

灸法大小多少歌

頭骨手足皮薄瘦巨闕鳩尾小少宜背腹臍下皮肉厚
大多方能起痼疾

註

凡灸諸病必火足氣到始能求愈然頭與四肢皮
肉淺薄若併灸之恐肌骨氣血難堪必分日灸之
或隔日灸之其炷宜小壯數宜少有病必當灸巨
闕鳩尾二穴者必不可過三壯艾炷如小麥恐火

氣傷心也背腹下皮肉深厚艾炷宜大壯數宜多
使火氣到始能去痼冷之疾也

灸法調養歌

灸後風寒須謹避七情過極慎起居生冷醇酒諸厚味
惟茹蔬淡適其宜

註

凡灸後須謹避風寒慎其起居養其氣血其喜怒
憂思悲恐驚不可過極和其情志及禁食一切生
冷醇酒厚味等物即食蔬淡亦當適宜不可過度

以調養脾胃也

灸瘡調治歌

灸瘡不發氣血竭七日發膿病必除發後膏貼防外襲
薄連葱薑淨瘡污

註

凡灸諸病灸瘡應發不發是其氣血大虧不必復
灸即灸亦多不能愈過七天之後艾疤發時膿水
稠多其病易愈以其氣血充暢經絡流通也發後
貼膏藥者防其六淫外襲也如灸瘡黑痛膿汁污

穢乃艾火毒盛必用薄荷黃連葱皮芫荽煎湯洗之自愈也

灸瘡膏藥歌

芩連白芷金星草乳香淡竹當歸好薄荷川芎與葱白
香油煎藥粉成膏

以上藥味各等分用香油煎藥去渣再下鉛粉熬成膏專貼灸瘡

行鍼避忌歌

行鍼避忌雨大風饑飽醉怒渴勞驚男內女外猶堅守
更看人神不可逢行鍼避忌雖如此還推病之緩急行
緩病欲鍼擇吉日急病行鍼莫稍停

註

按行鍼避忌於未刺之先如風雨晦冥人之氣血
即凝滯而不調大饑者氣虛新飽者氣盛大醉者
氣亂大怒者氣逆大渴者液少大勞者氣乏大驚
者氣散凡此者鍼亂氣散行鍼須當避忌俟其必
清必靜聚精會神方保無誤也既刺之後尤當戒

慎男子忌內女子忌外忌外者堅拒勿出忌內者
謹守勿內則邪氣必去正氣必復是謂得氣理固
然矣猶有達變之法存焉緩病須擇神吉急病豈
可待時哉

四季人神所在禁忌鍼灸歌

四季人神所在處禁忌鍼灸莫妄施春在左脇秋在右
冬在於腰夏在臍

註
四季人神所在之處謂人之神氣初動之處同乎

天之流行也禁鍼灸者恐傷生氣也人神常在心
春在左脇者肝主升也秋在右脇者肺主降也冬
在腰者神主藏也夏在臍者脾主化也

逐日人神所在禁忌鍼灸歌

一日足大二外踝三日股內四在腰五口六手七內踝
八腕九尻十背腰十一鼻柱二髮際三牙四胃五徧身
六胸七氣八股內九足二十內踝尋廿一手小二外踝
三日肝足四手明五足六胸七在膝八陰九脛晦趺停

註

足大足之大指也氣氣衝也手小手之小指也手明手陽明也足足陽明也陰男女前陰中也晦月盡也跣足十指岐骨也

十二時人神所在禁忌鍼灸歌

子踝丑頭寅耳邊卯面辰項巳乳肩午脇未腹申心主酉膝戌腰亥股端

註

子踝左右內踝外踝也寅耳邊左右兩耳也辰項頸項也巳乳肩兩乳兩肩也午脇左右脇也未腹

大腹少腹也。申心主胸膈也。酉膝左右兩膝也。戌腰腰背也。亥股兩股內外也。

禁鍼穴歌

禁鍼穴道要先明。腦戶顙會及神庭。絡却玉枕角孫穴。
顙息承泣隨承靈。神道靈臺臚中忌。水分神關并會陰。
橫骨氣衝手五里。箕門承筋及青靈。乳中上髀三陽絡。
二十三穴不可鍼。孕婦不宜鍼。合谷三陰交內亦通論。
石門鍼灸應須忌。女子終身無妊娠。外有雲門并鳩尾。

缺盆客主人莫深肩井深時人悶倒三里急補人還平
刺中五藏膽皆死衝陽血出投幽冥海泉顙竅乳頭上
脊間中髓偃僂形手魚腹陷陰股內膝臑筋會及腎經
腋股之下各三寸目眶關節皆通評

焚灸穴歌

焚灸之穴四十七承光瘕門風府逆睛明攢竹下迎香
天柱素膠上臨泣腦戶耳門瘕腧通禾膠顙膠絲竹空
頭維下關人迎等肩貞天牖心俞同乳中脊中白環俞

鳩尾淵液如周榮腹哀少商并魚際經渠天府及中衝
陽池陽關地五會漏谷陰陵條口逢殷門申脈承扶忌
伏兔髀關連委中陰市下行尋犢鼻諸穴休將艾火攻

製鍼法歌

製鍼須用馬啣鐵惟有金鍼更可嘉
煅煉塗酥插臘肉煮鍼之藥有多法

註

製鍼用馬嚼環鐵者以馬屬午午為火火尅金取
尅制之義也若以真金製鍼用之更佳其煅煉之

法將鐵絲於火中煨紅截為二寸或三寸或五寸
長短不拘次以蟾酥塗鍼上入火中微煨取起復
照前塗酥煨三次乘熱插入臘肉皮之裏肉之外
將後藥用水三碗煎沸次入鍼肉在內煮至水乾
傾於水中待冷將鍼取出於黃土中插百餘下以
去火毒其鍼要光圓不可用尖鋒次以桐絲纏其
柄

煮鍼藥方

麝香 五分

膽礬 一錢

石斛 一錢

穿山甲 三錢

硃砂 三錢

沒藥 三錢

鬱金 三錢

川芎 三錢

細辛 三錢

甘草節 五錢

沉香 五錢

磁石 一兩

已上諸藥氣味能引入鍼內

御纂醫宗金鑑卷八十六

欽定四庫全書

子部

御纂賢宗金鑑卷八十七

詳校官太醫院恩糧_臣孔毓秀

編修_臣倉聖脈覆勘

總校官中書_臣朱 鈐

校對官主事_臣張 培

謄錄舉人_臣郭履元

繪圖監生_臣戴禹汲

欽定四庫全書

御纂醫宗金鑑卷八十七

編輯正骨心法要旨目錄

外治法

手法總論

手法釋義

器具總論

裹帛

無圖

振挺

無圖

用法釋義

披肩

無圖

用法釋義

攀索疊軌用法圖

用法釋義

通木圖

通木用法圖一

通木用法圖二

用法釋義

腰柱圖

腰柱用法圖

用法釋義

竹簾杉離圖

竹簾杉離用法圖

用法釋義

抱膝圖

抱膝用法圖

用法釋義

擊扑損傷應刺諸穴經義

應刺諸穴圖

惡血已留復因怒傷肝經義

擊扑傷後入房傷脾經義

擊扑損傷瘀色經義

人身正面全圖

人身背面全圖

骨度正面全圖

骨度背面全圖

骨度側面全圖

骨度正面尺寸圖

骨度背面尺寸圖

骨度尺寸經義

金匱要略卷八十七目錄
補遺

十不治證

御纂醫宗金鑑卷八十七目錄

欽定四庫全書

御纂醫宗金鑑卷八十七

編輯正骨心法要旨

外治法

手法總論

夫手法者謂以兩手安置所傷之筋骨使仍復於舊也但傷有重輕而手法各有所宜其痊可之遲速及遺留殘疾與否皆關乎手法之所施得宜或失其宜

或未盡其法也蓋一身之骨體既非一致而十二經筋之羅列序屬又各不同故必素知其體相識其部位一旦臨證機觸於外巧生於內手隨心轉法從手出或拽之離而復合或推之就而復位或正其斜或完其闕則骨之截斷碎斷斜斷筋之弛縱卷攣翻轉離合雖在肉裏以手捫之自悉其情法之所施使患者不知其苦方稱為手法也况所傷之處多有關於性命者如七竅上通腦髓最近心君四末受傷痛苦

入心者即或其人元氣素壯敗血易於流散可以尅期而愈手法亦不可亂施若元氣素弱一旦被傷勢已難支設手法再誤則萬難挽回已此所以尤當審慎者也蓋正骨者須心明手巧既知其病情復善用夫手法然後治自多效誠以手本血肉之體其宛轉運用之妙可以一已之卷舒高下疾徐輕重開合能達病者之血氣凝滯皮肉腫痛筋骨攣折與情志之苦欲也較之以器具從事於拘制者相去甚遠矣是

則手法者誠正骨之首務哉

手法釋義

摸法

摸者用手細細摸其所傷之處或骨斷骨碎骨歪骨整骨軟骨硬筋強筋柔筋歪筋正筋斷筋走筋粗筋翻筋寒筋熱以及表裏虛實並所患之新舊也先摸其或為跌撲或為錯閃或為打撞然後依法治之

接法

接者謂使已斷之骨合攏一處復歸於舊也凡骨之跌

傷錯落或斷而兩分或折而陷下或碎而散亂或岐而
傍突相其形勢徐徐接之使斷者復續陷者復起碎者
復完突者復平或用手法或用器具或手法器具分先
後而兼用之是在醫者之通達也

端法

端者或兩手一手擒定應端之處酌其重輕或從下往
上端或從外往內托或直端斜端也蓋骨離其位必以
手法端之則不待曠日遲久而骨縫即合仍須不偏不

倚庶愈後無長短不齊之患

提法

提者謂陷下之骨提出如舊也其法非一有用兩手提者有用繩帛繫高處提者有提後用器具輔之不致仍陷者必量所傷之輕重淺深然後施治倘重者輕提則病莫能愈輕者重提則舊患雖去而又增新患矣

按摩法

按者謂以手往下抑之也摩者謂徐徐揉摩之也此法

蓋為皮膚筋肉受傷但腫硬麻木而骨未斷折者設也
或因跌撲閃失以致骨縫開錯氣血鬱滯為腫為痛宜
用按摩法按其經絡以通鬱閉之氣摩其壅聚以散瘀
結之腫其患可愈

推拿法

推者謂以手推之使還舊處也拿者或兩手一手捏定
患處酌其宜輕宜重緩緩焉以復其位也若腫痛已除
傷痕已愈其中或有筋急而轉搖不甚便利或有筋縱

而運動不甚自如又或有骨節間微有錯落不合縫者是傷雖平而氣血之流行未暢不宜接整端提等法惟宜推拿以通經絡氣血也蓋人身之經穴有大經細絡之分一推一拿視其虛實酌而用之則有宣通補瀉之法所以患者無不愈也

已上諸條乃八法之大略如此至於臨證之權衡一時之巧妙神而明之存乎其人矣

器具總論

跌撲損傷雖用手法調治恐未盡得其宜以致有治如未治之苦則未可云醫理之周詳也爰因身體上下正側之象製器以正之用輔手法之所不逮以冀分者復合欹者復正高者就其平陷者升其位則危證可轉於安重傷可就於輕再施以藥餌之功更示以調養之善則正骨之道全矣

--	--	--	--	--	--	--	--

裹帘

器一
無圖

裹帘以白布為之因患處不宜他器只宜布纏始為得法故名裹帘其長短濶狹量病勢用之

振挺

器二
無圖

振挺即木棒也長尺半圓如錢大或麪杖亦可蓋受傷之處氣血凝結疼痛腫硬用此挺微微振擊其上下四旁使氣血流通得以四散則疼痛漸減腫硬漸消也

用法釋義

凡頭被傷而骨未碎筋未斷雖瘀聚腫痛者皆為可治
先以手法端提頸項筋骨再用布纏頭二三層令緊再
以振挺輕輕拍擊足心令五臟之氣上下宣通瘀血開
散則不奔心亦不嘔呃而心神安矣若已纏頭拍擊足
心竟不覺疼昏不知人痰响如拽鋸身體僵硬口溢涎
沫乃氣血垂絕也不治

披肩

器三
無圖


披肩者用熟牛皮一塊長五寸寬三寸兩頭各開二孔

夾於傷處以棉繩穿之緊緊縛定較之木板稍覺柔活
用法釋義

凡兩肩撲墜捫傷其骨或斷碎或旁突或斜努或骨縫
開錯筋翻法當令病人仰卧凳上安合骨縫揉按筋結
先以棉花貼身墊好復以披肩夾住肩之前後縛緊再
用白布在外纏裹畢更用扶手板長二尺餘寬三四寸
兩頭穿繩懸空掛起令病人俯伏於上不使其肩骨下
垂過七日後開視之如俱痊可撤板不用如尚未愈則

仍用之若不依此治法後必遺殘患蘆節

攀 索 疊 甌 用 法 圖



攀索

器四

攀索者以繩掛於高處用兩手攀之也

疊甄

器五

疊甄者以甄六塊分左右各疊置三塊兩足踏於其上
也


用法釋義

凡胸腹脇跌打礮撞墊努以致胸陷而不直者先令
病人以兩手攀繩足踏甄上將後腰拿住各抽去甄一

箇令病人直身挺胸少頃又各去甄一箇仍令直身挺
胸如此者三其足著地使氣舒瘀散則陷者能起曲者
可直也再將其胸以竹簾圍裹用寬帶八條緊緊縛之
勿令窒碍但宜仰睡不可俯卧側眠腰下以枕墊之勿
令左右移動

--	--	--	--	--	--	--	--


通木圖



通木背面用法圖



通木正面用法圖



通木

器六

用杉木寬三寸厚二寸其長自腰起上過肩一寸許外面平整向脊背之內面刻凹形務與脊骨贅肉吻合約以五分分去聲度之第一分自左側面斜鑽二孔右側面

斜鑽二孔越第二分至第三分四分五分俱自左右側面各斜鑽一孔用寬帶一條自第一分上左孔穿入上越右肩下胸前斜向左腋下繞背後穿於第一分右次孔內再用一帶自第一分上右孔穿入上越左肩下胸


前斜向右腋下繞背後穿入第一分左次孔內兩帶頭
俱折轉繫紮木上第三分四分亦以帶穿之自軟肋橫
繞腹前復向後穿入原孔內繫紮木上第五分以帶穿
入孔內平繞前腹復向後繫紮木上切勿游移活動始
於患處有益凡用此木先以綿絮軟帛貼身墊之免致
疼痛

用法釋義


凡脊背跌打損傷脊骨開裂高起者其人必偃僂難仰

法當令病者俯卧再著一人以兩足踏其兩肩醫者相
彼開裂高起之處宜輕宜重或端或拿或按或揉令其
縫合然後用木依前法逼之

腰 柱 圖



腰柱用法圖



腰柱 器七


腰柱者以杉木四根製如扁擔形寬一寸厚五分長短以患處為度俱自側面鑽孔以繩聯貫之

用法釋義

凡腰間閃挫岔氣者以常法治之若腰節骨被傷錯筍脊肉破裂筋斜偻僂者用醋調定痛散敷於腰柱上視患處將柱排列於脊骨兩旁務令端正再用蘄艾做薄褥覆於柱上以禦風寒用寬長布帶繞向腹前緊緊繫

裏內服藥餌調治自愈

竹簾圖 杉離圖



竹簾杉離用法圖



竹簾

器八

竹簾者即夏月涼簾也量患處之大小長短裁取之

用法釋義

凡肢體有斷處先用手法安置訖然後用布纏之復以竹簾圍於布外緊緊之使骨縫無參差走作之患乃通用之物也

杉籬

器九

杉籬者複逼之器也量患處之長短濶狹曲直凸凹之


形以杉木為之酌其根數記清次序不得紊亂然後於每根兩頭各鑽一孔以繩聯貫之有似於籬故名焉但排列稀疏不似竹簾之密耳

用法釋義

凡用以圍裹於竹簾之外將所穿之繩結住再於籬上加繩以纏之取其堅勁挺直使骨縫無離綻脫走之患也蓋骨節轉動之處與骨節甚長之所易於搖動若僅用竹簾恐挺勁之力不足故必加此以環抱之則骨縫

吻合堅牢矣

抱膝圖



抱膝用法圖



抱膝

器十

抱膝者有四足之竹圈也以竹片作圈較膝蓋稍大些須再用竹片四根以麻線緊縛圈上作四足之形將白布條通纏於竹圈及四足之上用於膝蓋雖拘制而不致痛苦矣

用法釋義

膝蓋骨覆於髌骨二骨之端本活動物也若有所傷非骨體破碎即離位而突出於左右雖用手法推入原位

但步履行止必牽動於彼故用抱膝之器以固之庶免復離原位而遺跛足之患也其法將抱膝四足插於膝蓋兩旁以竹圈轄住膝蓋令其穩妥不得移動再用白布寬帶緊緊縛之

經義

擊仆損傷應刺諸穴

素問繆刺論曰人有所墮墜惡血留內腹中滿脹不得前後先飲利藥此上傷厥陰之脈下傷少陰之絡刺足內踝之下然谷之前血脈出血刺足跗上動脈不已刺三毛各一痛見血立已左刺右右刺左

註

此言惡血為病有繆刺之法也人因墮墜致惡血留內腹中滿脹前後不通當先用利藥如上傷厥

陰肝經之脈下傷少陰腎經之絡當刺內踝之下
然谷之前有血脈令出血者蓋以此屬少陰之別
絡而交通乎厥陰也兼刺足跗上動脈即衝陽穴
乃胃經之原也如病不已更刺三毛上大敦穴左
右各一痛見血立已繆刺者左刺右大敦右刺左
大敦也但足跗動脈上關衝脈少陰陽明三經只
宜淺刺不可出血不已也

靈樞經寒熱病篇曰身有所傷血出多及中風寒若有

所墮墜四支懈惰不收名曰體惰取其小腹臍下三結交三結交者陽明太陰也臍下三寸關元也

註

此言身有所傷血出多者及中風寒者破傷風之屬也或因墮墜不必血出而四支懈惰不收者皆名體惰也關元任脈穴名又足陽明太陰之脈皆結於此故為三結交也

靈樞經厥病論曰頭痛不可取於脰者有所擊墮惡血在內傷痛未已可側刺不可遠取之也

註

經言惡血在內頭痛不可取其膺者蓋頭痛取膺以泄其氣則頭痛可愈也若有所擊墮惡血在內而取膺以泄其氣則是血病治氣矣故勿取其膺焉若所擊扑之腠肉傷痛不已雖用刺法亦只於所傷附近之側刺之以出在內之惡血而已若仍按經遠取諸膺以療頭痛則不可也

應刺穴圖



關元

應刺穴圖



惡血已留復因怒傷肝

靈樞經邪氣藏府病形篇曰有所墮墜惡血在內有所大怒氣上而不下積於脇下則傷肝

註

人因墮墜血已留內若復因大怒傷肝其氣上而不下則留內之血兩相凝滯積於脇下而肝傷矣法當先導怒氣勿積於肝則肝可以無傷然後飲以利藥以破惡血則脇下無留血矣

擊扑傷後入房傷脾

靈樞經邪氣藏府病形篇曰有所擊扑若醉入房汗出
當風則傷脾

註
有所擊扑乃傷其外體也如醉後入房或汗出不
知避忌當風則邪客於肌膚傷其內體矣是皆傷
脾之因也

擊扑損傷衄色

素問衄要精微論曰肝衄搏堅而長色不青當病墜若因血在脇下令人喘逆

註

此言肝衄有剛柔而病亦以異也肝衄搏擊於手而且堅且長其色又不青當病或墜或搏因血積於脇下令人喘逆不止也正以厥陰之衄布脇肋循喉嚨之後其支別者復從肝貫膈上注肺今血在脇下則血之積氣上薰於肺故令人喘逆也


金匱要略曰寸口脈浮微而濇然當亡血若汗出設不汗出者其身有瘡被刀斧所傷亡血故也

註經言奪血者無汗奪汗者無血蓋二者皆當脈浮微而濇今診之如此是有枯竭之象而無汗出之證非亡血而何故知有金傷或擊扑而亡血之證也


又論曰肝脈搏堅而色不變必有擊墮之事因脘肉無破則惡血必留脇下兼致嘔逆依經鍼刺然

谷足跗或三毛等穴出血或飲利藥使惡血開行
當自愈也若瘀浮微而瀉當知亡血過多依經於
三結交關元穴灸之或飲大補氣血之劑而調之
則病已矣


人 身 正 面 全 圖




人身背面全圖



骨度正面全圖




骨度背面全圖




骨度側面全圖



骨度正反面尺寸圖



骨度背尺面圖



靈樞經骨度尺寸

頭部

項髮以下至背骨長二寸半

自後髮際以至大椎項骨三節處也

按頭部折法以前髮際至後髮際折為一尺二寸如

髮際不明則取眉心直上後至大杼骨折作一尺八寸此為直寸橫寸法以眼內角至外角此為一寸頭部橫直寸法並依此

胸腹部

結喉以下至缺盆中長四寸

此以巨骨上陷中而言即天突穴處

缺盆以下髑髀之中長九寸

胸圍四尺五寸

兩乳之間廣九寸半

當折八寸為當

髑髀中下至天樞長八寸

天樞足陽明穴名在臍旁此指平臍而言

天樞以下至橫骨長六寸半橫骨橫長六寸半

毛際下骨曰橫

骨

按此古數以今用上下穴法參較多有未合宜從後

胸腹折法為當

兩髀之間廣六寸半

此當兩股之中橫骨
兩頭之處俗名髀縫

按

胸腹折法直寸以中行為之自缺盆中天突穴起

至岐骨際上中庭穴止折作八寸四分自髑髏上
岐骨際下至臍心折作八寸臍心下至毛際曲骨
穴折作五寸橫寸以兩乳相去折作八寸胸腹橫
直寸法并依此

背部

脊骨以下至尾骶二十一節長三尺

脊骨脊骨也脊骨外小而內巨人之

所以能負任者以是骨之巨也脊骨二十四節今云二十一節者除項骨三節不在內

腰圍四尺二寸

按

背部折法自大椎至尾骶通折三尺上七節各長一寸四分一釐共九寸八分七釐中七節各一寸六分一釐共一尺一寸二分七釐第十四節與臍平下七節各一寸二分六釐共八寸八分二釐共二尺九寸九分六釐不足四釐者有零未盡也直

寸依此橫寸用中指同身寸法○脊骨內濶一寸
凡云第二行俠脊一寸半三行俠脊三寸者皆除
脊一寸外淨以寸半三寸論故在二行當為二寸
在三行當為三寸半也

側部

自拄骨下行腋中不見者長四寸

拄骨頸項
根骨也

腋以下至季脇長一尺二寸

季脇小
肋也

季脇以下至髀樞長六寸

大腿曰股股上曰髀髀骨之
下大腿之上兩骨合縫之所

曰髀樞當足少陽環跳穴處也

髀樞下至膝中長一尺九寸

橫骨上廉下至內輔之上廉長一尺八寸

骨際曰廉膝旁之骨突出

者曰輔骨內曰內輔外曰外輔

內輔之上廉以下至下廉長三寸半

上廉下廉可摸而得

內輔下廉下至內踝長一尺二寸

內踝以下至地長三寸

四肢部

肩至肘長一尺七寸

肘至腕長一尺二寸半

臂之中節曰肘

腕至中指本節長四寸

臂掌之交曰腕

本節至末長四寸半

指之後節曰本節

膝以下至外踝長一尺六寸

膝腠以下至跗屬長一尺二寸

腠腿灣也跗足面也膝在前腠在後跗屬者凡

兩踝前後脛掌所交之處皆為跗之屬也

跗屬以下至地長三寸

外踝以下至地長一寸

足長一尺二寸廣四寸半

按

骨度乃靈樞經骨度篇之文論骨之長短皆古數也然骨之大者則太過小者則不及此亦言其則耳其周身手足折量之法用前中指同身寸法為是同身寸量法詳刺灸書中

--	--	--	--	--	--	--	--	--

補遺

十不治證

顛撲損傷入於肺者縱未及死二七難過

左脇下傷透至內者

腸傷斷者

小腹下傷內者

證候繁多者

傷破陰子者

老人左股壓碎者

血出盡者

肩內耳後傷透於內者

脈不實重者

已上皆不必用藥

御纂醫宗金鑑卷八十七